

FM2026/189

Nunami naalakkersuinikkut aaqqissuussinermut Tunngaviusumik Inatsisissatut missingiut Inatsisartunut ingerlatitseqqinnissaannut Inatsisartuniillu akuersissummik pinissaq pillugu Naalakkersuisut inatsimmik missingiummik suliakkerneqarnissaannik Inatsisartut aalajangiiffigisassaattut siunnersuut. Missingiut Inatsisartunut kingusinnerpaamik UPA2027-mut saqqummiunneqassaaq.

(Inatsisartunut ilaasortaq Pele Broberg, Naleraq)

Akissuteqaat

(Naalakkersuisut siulittaasuat Jens-Frederik Nielsen)

Pele Brobergi Inatsisartut aalajangiiffigisassaattut siunnersuuteqarneranut qutsavigaarput.

Siunnersuuteqartup kissaatigaa, Inatsisartut ingerlatitseqqinissaat siunertaralugu aalajangiiffigisassaannik Inatsit Tunngaviusussap inaarsarneqarnissaanut Naalakkersuisut peqquneqassasut.

Inatsit Tunngaviusussamut Isumalioqatigiissitap Inatsit Tunngaviusussamut missingiummik tunniussereernera aammalu Naalakkersuisut angalallutik naalagaaffinngornissaq pillugu saqqummiussartorsimanagerat siunnersuuteqartup siunnersuutimini ilaatigut tunngavilersutigai. Siunnersuuteqartoq isumaqarpoq, suliamik pitsaasumik ingerlatitseqqinissamut suleriaqqinnissaq nanginniarlugu – Naalakkersuisut Inatsit Tunngaviusussamik inaarsaanissaannik peqquneqassasut.

Ukioq ataaseq sinnilaarlugu matuma siorna Inatsisartut Naalakkersuisunut peqqusipput, ilaatigut Namminersorneq pillugu Inatsimmi § 21-mik qulaajaasussanik aammalu Inatsit Tunngaviusussamik naliliisussanik politikkikkut tunngaveqanngitsumik isumalioqatigiissitaliussasut.

§ 21-Isumalioqatigiissitami qulaajaalluni sulineq qaammatit pingasungajaat (marsip 18-iani) matuma siorna aallartinneqarpoq, sulianilu ukiup ataatsip iluani naammassiniartussaavaa.

§ 21-Isumalioqatigiissitami Inatsisartut kissaataat naapertorlugu ilaatigut Inatsit Tunngaviusussamut missingiut inatsisilerinikkut naliliiffigineqassaaq, tamatumani naalagaaffinngoriartornermut tunngasortaa ilanngullugu naliliiffigineqassalluni, taamatuttaaq Inatsit Tunngaviusussap imassaanut tunngasunik siunnersuuteqartoqassalluni.

Isumalioqatigiissitami ilaatigut naliliiffigineqassaaq, Inatsit Tunngaviusussaq imarisamigut naalagaaffiit tamat oqartussaaqataanerat tunngavigalugu ingerlasuusut tunngaviusumik inatsisaannut naapertuunnersoq aammalu nunat tamalaat akornanni nutaaliaasuni pitsaassutsimigut naapertuunnersoq.

Namminersorneq pillugu inatsimmi § 21-p qulaajaavigineqarnissaa aammalu Inatsit Tunngaviusussap inatsisilerinikkut naliliiffigineqarnissaa Kalaallit Nunaata siunissaanut pingaaruteqarluinnartussamik sukumiisumik suliaqarfiusussaavoq, taamatumani isumalioqatigiissitami siunissami aaqqissuuseriartorarsinnaasut eqqumaffigineqassallutik.

§ 21-Isumalioqatigiissitami – ilisimasalinnit suliaqarfiusussami – suliakkerneqarluni qulaajaalluni suliaqarnissaq Naalackersuisunit tatigaarput. Taamaammatt § 21-Isumalioqatigiissitap sulinerata saniatigut Naalackersuisut Inatsit Tunngaviusussamik inaarsaanissaanik peqquneqarnissaat Naalackersuisunit naapertuutinningsutut isumaqarfigineqarpoq.

Naalackersuisunit Inatsisartut siunnersuut pillugu oqallilluarnissaat kissaappagut.